

中國方志叢書·華南地方·第二七四號


據

清·彭焯修，楊德明纂
光緒三年刊本

影印

貴州省

續修正安州志



成文出版社有限公司印行



中國方志叢書·華南地方·第二七四號


據

清·彭焯修，楊德明纂
光緒三年刊本

影印

貴州省

續修正安州志



成文出版社有限公司印行

5643/09



續修正安州志序

邑之有志猶國之有史史以昭善惡寓勸懲志則獨
許於善弗及於惡不能無同異焉然修志之難更難
於修史一代之史必先有一代之實錄志非有實錄
可據也道里之遠近山川之形勝今不異於古所云
卽以前賢論如尹公徐公彰彰耳目者婦孺咸知無
今古也亦無煩累千萬言惟風俗之盛衰人心之厚
薄以及忠孝廉節之隨時隨地而生者事猶待於表
揚名不傳於里黨有非博覽衆論留心當世者爲之

代白其隱曲諒其情其不湮沒泯滅也幾何矣不特
此也人情無不好名平日蕩校踰閑官不居何
等迫地方有事於志凡有財力與勢者無不百計
緣盜名欺世採訪者既非一端秉筆者實繁有徒議
論囂張是非倒置甚至樹私植黨賄賂公行彼則曰
吾鄉有某某者忠厚傳家我亦曰吾鄉有某某者孝
思維則彼又曰論廉讓無過吾鄉某我亦曰論節操
無過吾鄉某蠶蛙迭噪吠犬爭鳴卽有一二老成出
而事執而一人之力又不足以敵眾口以致濫廁其

間者半皆不忠不孝不廉不節之徒而所謂忠孝廉
節實有其人其事者或反因財力之盡時勢之窮而
不得與於斯以是爲志欲其厚風俗正人心也得乎
閱正邑新志諸弊盡鋤
揆厥由來則皆

州主彭公一人終始條理公長沙名世黔省循良以
國史之宏才成州志之小品而又牧斯土多歷年所
見聞周窮鄉僻壤品評恥附和隨聲其採取似寬而
覈實循名雖近寬而仍隘其體裁兼備而屬辭比事

不責備而求全不以疑似參不以真僞亂不以寒微
薄世族不以阿諛徇人情凡有關於風俗人心者無
鉅細無顯晦未嘗有一人一事之或遺若網在綱有
條不紊稟經酌雅衆美咸賅是真能發潛德之幽光
昭定論於千載異日風俗之隆人心之茂當更有蒸
蒸蒸日上者則斯志之裨益匪淺鮮也而我

州主彭公之以斯志裨益於珍州也又豈言思擬議
所能罄哉後有作者必將永鑑於斯編

光緒三年丁丑歲仲秋月既望珍州劉福田謹序


續修正安州志序

正安舊無志自南豐趙君因袁氏舊說以成書寶應
朱君嗣增益之紀載畧備矣咸豐戊午後地方多故
世事滄桑舊典新聞人歸剝落君子慨然有無徵之憾
焉 觀察彭公以名儒來牧斯土寬猛兼濟政通人
和明年乙亥春黔纂修通志檄郡縣以六月爲限修
志上呈以資采輯時值嫠匪竄境戎馬倉皇 公請
於大府得展限月餘後鄒酋授首整旅歸來遂開局
延紳分類授簡撫殘編於灰燼訪軼說於遺民惟覈

惟詳既戒既備如限繕本呈局獲蒙優獎適余奉委
在茲得以悉其顛末越明年籌貲付剞劂命余弁題
數言余受而讀之竊嘆此書之作 公之以憲章垂
久遠者 公實以治理詔來茲夫考古以證今觀民
以設教已然者未然之鑒前事者後事之師故李吉
甫作元和郡國志謂持此可善治焉儒者得所藉手
競業講求恆思有以報最驟而問以天時之變遷地
利之險易人事之推移物產風俗之有隆殺厚薄建
修政事之有沿革異同與夫名宦先後之教說鄉賢

流寓之文章或至茫然無以爲記則所謂素越而肥
瘠者其又何說以解免今舉夫有聞政教者垂之簡
端俾後之同志君子一開卷而羅羅如數掌上紋於
是乎孰興孰廢孰張孰弛疇得疇失疇緩疇急胥取
資而有餘此則治理之龜鑑而公惓惓是志之心
也若將以物色山川表章圖籍助遊人之賞眺備才
士之謳謔則又斯志之末義矣

光緒三年丁丑仲冬穀旦姑蘇陸茂椿蘭臺氏謹序



續修正安州志由

光緒元年三月初二日奉

貴州通省善後總局

頭品頂戴布政使司現任巡撫部院黎

頭品頂戴按察使司現任布政使司林

布政使銜糧儲道現署按察使司吳

布政使銜候補道陳

總辦書局布政使銜現署貴東分巡兵備道易 爲

札飭事照得徵文考獻問俗觀風實政治之先

務黔省通志自乾隆六年辛酉增修至今百有三十餘年世代寥遠既懼無徵且咸豐以來兵亂垂二十載一切典章舊籍所存無多天時之變遷建置之沿革政教之轉移民物之聚散與夫名宦良將之勲績耆舊儒林之言行以及忠孝節義選舉藝文之衆若不再加搜輯勢將愈卽廢泯本司道現已

會稟

撫憲會

奏明開局在案爲此札飭屬所有府廳州縣
皆須設局延紳采訪每局紳士幾人酌備薪水
蓋功程既鉅經費維艱守土者責重地方紳士
等事關係梓諒必踴躍從公以襄盛舉而省虛
糜其應采事宜備列於後依類采輯以六個月
爲限限內彙上者記大功一次逾限者記大過
一次事在必行該地方官等勿得任意宕延閣
置爲不急之務致干咎戾亦不得潦草塞責錯
訛乖謬考核難憑所采自乾隆六年辛酉起其

地方先有舊志及嘉慶道光以來續有增修者
概將其書呈局其成志以後事實仍須按年照
采亦以舊月為限或志雖修而經亂無存亦即
稟聞在省搜訪備難尋覓其采訪仍自乾隆六
年起其有地方力能修志者或能於所限六個
月內成書即繕寫全書呈局如限內不能成書
仍先將采訪事畧呈局凡地方文武紳耆等務
須踴躍同心勤勸采輯本局濡筆以待期文獻
之有徵庶方乘之垂久實有厚望焉切切特札

旋又奉到

各憲札飭茲據都勻府羅守詳據獨山州李牧
稟稱設局開辦采訪薪水一層是否由局請領
抑或就地籌措等語自應分別明晰惟地方兵
燹之後籌措雖少亦恐擾民而省局經費艱難
其應用薪水亦當共體時艱毋求豐腴前檄既
以六個月爲限薪水亦以六個月爲率每月無
論人數准總開報銀參拾兩概不准指派民間
致滋擾累各等因奉此查正安自乾隆三十八

年州牧袁治勑修成志後經趙牧補修朱牧重修彙分四卷遠同治乙丑燬於兵板籍俱灰獻典均無可考焯於甲戌六月履任卽搜羅舊志僅得殘編茫無倫次越明年春奉札飭續修適值婺源鄒酋滋擾州東南界募練親剿督團堵禦稽延匝月始克言旋爰具展限稟言仰沐憲恩俯允導於麥秋上浣之十日開局傳集孝廉呂啟庭廣文徐以敷陳開籍周南諸紳再四熟籌刊發條例札飭各甲紳者就近來訪以期

迅速以免漏遺聘請訓導德明州判嚴宗六
秉筆成書幸得各紳昕夕從公已於限內告竣
繕寫十卷上呈時因乏款刊刻將采輯原本彙
存州局延擱久之竊思事有善舉不得善成未
免前功盡棄爰設法籌畫工費至今春始付剞
劂紀一州之實蹟卽以副

上憲之深心志乘有成因記其遵辦如是

光緒三年歲在丁丑孟秋月上浣之十日

欽差銜候補府僉事補用直隸州知州彭煒謹誌